

De Probatis|| Sanctorvm|| Historiis

Partim|| Ex Tomis Aloysii Lipoma-||ni, Doctissimi Episcopi, Partim Etiam||
Ex Egregiis Manvscriptis Codicibvs, Qvarvm permultæ antehàc nunquàm
in lucem prodiêre

Complectens Santos Mensivm|| Maii Et Ivnii

Surius, Laurentius

Coloniae Agrippinae, 1576-

VD16 S 10258 - 10263

De S. Rictrude Martianensi.

[urn:nbn:de:hbz:466:1-77393](https://nbn-resolving.de/urn:nbn:de:hbz:466:1-77393)

Tuum Modoalde nomen, tuum meritum omnis sexus & ætas super astra tulere, Deum gloriosum & mirabilem in sanctis suis, repetito prædicantes clamore.

Post hæc venit vir venerandæ religionis, Abbas merito & nomine, de Saxoniæ partibus, diurno iam accensus desiderio, ut patroni alicuius probatae sanctitatis corpus integrum, quod sibi largiri dignaretur Dominus, honorifice quis inferret sedibus. Hic nanque, prælibatis suis suorumque ieiunijs & orationibus, crebrisque vigiliarum singultibus, quasi prærogatiujs apud Deum obtinuerat legationibus, ne votis sui desiderij deberet frustrari. Quapropter ipsius gratia præeunte ac disponente, & venerandæ memorie Brunone Archiepiscopo annuente, totiusque ecclesiæ concordi voto adspirante, gloriolissimi pontificis Modoaldi corpus preciosissimum meruit suscipere. Quod cum inestimabili gloria & solenni ornato ac melodia, vniuerso clero comitate, & promiscui sexus ac ætatis plebe circunfluente, de loco sua sedis eductum, in Saxoniæ decentissime est translatum, & in oratorio beati Petri Apostoli in cœnobio, quod dicitur Helinwardeshuysen, honorificè locatum. Acta sunt hæc anno Dominicæ incarnationis M. C. VII. à venerabili Thietmaro, huius nominis secundo, successione autem sexto eiusdem loci Abbat, anno ordinationis eius xxvij. regnante Domino nostro Iesu Christo cum Patre & Spiritu sancto in seculorum, Amen.

VITA S. RICTRVDIS MARTIANENSIS, PER
HVG BALDV MONACHVM ELNONENSEM, AD STE-
phanum Episcopum Cameracensem scripta Anno Christi 907. Stylus ob-
scurus & simplex, in gratiam Lectoris mutatus est per
F. Laurentium Surium.

PRAEFATIO AVTHORIS.

N membrorum Christi compage vñ excellentiori, ita merito quoque magis honorabili domino & præfili Stephano, secundum nomen suum Apostolicæ reverentia signo ab hominibus quidem coronato, sed demum ob meritorum insignia cum eis, quorum insitit vestigijs sanctitatis, à Deo coronando, Hugbaldu, fæderatum & monachorum omnium minimus, immarcescibilem, virtutumque floribus vernantem à Deo optat precaturque coronam. Rogârunt me iampridem Clerici & Deo sacratae virginis congregationis S. Rictrudis, vt tum illius, tum prolium eius gesta conscriberem: ego verò diffuli, vel quod quantulamcumque scientiam meam tanta materiæ scirem imparem, vel quod ob longitudinem temporum nulla certæ fidei scripta, quibus ea continerentur, mihi videre contigisset: vererisque, ne dubia pro exploratis, & vana atque cōmentitia pro veris annotarem. Sed cum renitent mihi quasdam offerrent historias, quæ cum dictis ipsorum consentirent, & iam fidem mihi facerent illi, quorum non contemnenda persona viderentur, quod ea, quæ ipsi affererent, olim literis consignata fuissent, sed Nortmannorum sequissima rabiæ omnia populante interijsent: demum adiuratus per tremendum diuinæ maiestatis nomen, cessi illis, fecique eti non vt debui, at tamen vt potui: nec mihi studio fuit verborum adhibere phaleras, sed lectoris & auditoris consulere utilitati. Cum autem opusculum absolutum vestra excellentia examinandum traderetur, vñsum est illius prudentia quædam in eo desiderari, quæ ad conciliandam libris autoritatem solent à studiosis requiri, nempe, personæ, loci & temporis annotationem. Et mihi quidem satis superque sufficere videbatur, si tam præclara tantorum virorum nomina, gesta & loca exprimente libello, supprimeretur locus & persona scriptoris, ne per hæc ceu atram quandam nubem osculari viderentur astra tanti splendoris: at quia aliter vñsum est sanctitati vestra, celeberrima nominis vestri præluciente lampadæ, nostras quoque confidimus illustratum iri, quanvis tetras, tenebras: dumque Stephanum inclitum antisitem libelli huius loquetur Praefatio, nostra quoque exigua persona mentio fiet. Locus autem, ut nōstis, non est mihi iam, sicut olim, in clarissima vrbe, sed libenter me gloriare vel postremum monasterij beatissimi Amandi, egregij confessoris Christi, monachum, nisi propter peccata mea tam crebro inde ejacerer meru barbaricae incursionis. Quid verò mihi tempus exprimere necesse est, quod omnium infelicissimum esse videtur, ita vt non nisi cum Prophetæ ad Deum clamare libitum sit: Latati sumus pro diebus, quibus nos humiliasti, annis, quibus vidimus mala. Respicce

Nortman-
norum po-
pulationes.

Psal. 59.

Spice Domine in seruos tuos & in opera tua: Ad nos quoque pertineat illud Apostolicum: Redimentes tempus, quoniam dies mali sunt? Sed ne in hoc quoque videar au- Ephes. 5.
thoritatis vestra iussa neglexisse, omissis regum nominibus, nouerit lector nos ista cu-
disse anno à nato Salvatore, summo rege, nongentesimo septimo. Ad profectum Ca-
tholicae Ecclesiae opto vobis feliciter ad votum valere.

VITÆ HISTORIA.

VM Francorum gentem, cuius maiores è Phrygia prodigiis 12. Maij.
ferunt, atque ex regio Troianorum stemmate ortos, Cap. 1.
post phanaticum simulacrorum cultum ad veritatis cogni- Vide Paulū
tionem diuina clementia vocare decreuisset, quemadmo- Aemylium
dum ex omni æternitate constituerat, ea tempestate, qua lib. 1. de re-
bus gestis
industrius rex Clodoueus eius gentis sceptrum tenebat, bea- Fracorum.
tissimi præfus Remigij ministerio id voluit compleri. Is
enim sanctissimus pontifex & multa vita integritate, & ad-
mirabili signorum virtute pollens, iam dictum regem &
magnum exercitus eius partem doctrina Catholice fidei
imbiuit, & vt ferunt, accepto cælitus chrismate, ad tria cir-
citer millia vno die baptizauit. Atque ex illo tempore magis magisque apud Francos
creuit religio, & in exteris etiam fines eorum prolatum est imperium, quod maiores
eorum partim sibi iam ante vendicarant. Nec hoc gentis eius feritati tribuendum est,
cuius nomine putantur à nonnullis Franci dicti, tanquam quibus à natura quedam in-
dita sit ferocitas: sed præstutum hoc eis est, quod duabus eximis columnis fulti,
quibus totius Ecclesiæ status inniti videretur: autoritate sanctorum Pontificum, Columnæ
quorum est præcellens honor: & virtute regum præpotentium, qui in administranda dux Eccle-
republica sagaces in primis fuere. His, inquam, rebus factum est, vt diuina tum præ-
ueniente, tum subsequente gratia, F R A N C O R V M potentia magis magisque
aucta & propagata sit: atque etiam vbi quondam abundauerat iniquitas, deinde in-
tantum Dei gratia superabundârit, vt quemadmodum cælum ornatur stellarum
multiplici pulchritudine, ita Francorum regio, præstante patre lumen, à quo est Iacob. r.
omne donum perfectum, multiuaria tam indigenarum, quam aliunde aduenientium
vtriusque sexus & ordinis sanctorum atque perfectorum hominum claritate illustra-
ta sit.

E quorum venerando collegio tanquam sidus quoddam eximum extitit Rictrudi, Cap. 2.
dis, deuota Christi ancilla, grata Deo suo, & chara hominibus atque laudabilis ob me- S. Rictrudis
rita iustitia & sanctitatis: quæ patrem habuit Ernoldum, virum nobilem, & * Lichiam parentes.
genitricem ex bellicosa Vasconum gente. Quæ gens licet ea tempestate magna ex par- Luciam
te demonum cultui esset addicta, at tamen à Deo electa Rictrudis, sic ab illis impijs tra-
xit originem, quemadmodum è spinis nascitur rosa: atque ab ipsis incunabulis cum te-
nere erat in cremento, honestis est moribus alta & instituta. Fuit autem temporibus
Clotarij regis, qui à magno Clodoueo, quem iam diximus primum ad Christi religio-
nem accessisse, quartus fuit, atque etiam huius Clotarij filii Dagoberti incliti, qui à
beatissimo Arnulpho Metœsi episcopo institutus, dignus & industria & viribus fuit,
qui vna cum patre regnaret, eiique in regno succederet. Habuit autem Dagobertus Aribertus
fratrem Aribertum, non tamen germanum. Ei attribuit urbes & pagos citra Ligerim frater Da.
flumen & usque ad Pyrenæos saltus: sapienti videlicet vñus consilio, pactusque ab eo, ne goberri.
quid vñquam paterni regni ab ipso repeteret. Itaque Aribertus Tolosanam obtinens
sedem, cùm in Aquitania regnaret, non diu post totam Vasconiam sibi subegit.

At Dagobertus in administrando regno præclarus, vni vitio subiacuit, immodico Cap. 3.
deditus amori mulierum. Vnde accidit, vt legitima coniuge sua ob sterilitatem repu- Dagober-
diata, alteram sibi copulârit. Cumque id flagitium in eo pontifices, in primis autem vir- tus mulie-
sanctissimus & mirabilium operum patrator præfus Amandus reprehenderet, ille indi- rosus.
gnatione & fastu regio incitatus, eundem venerabilem antistitem non absque iniuria è S. Amandi
suo regno eiecit. Ille vero pro Christi veritate persecutionem patientissime ferens, exilium.
quippe qui etiam sanguinem pro Christo fundere peroptaret, diuersis in locis diuini
verbis parsit semina, atque tandem etiam in Vasconiam, Rictrudis patriam peruenit, vt
celitus infuso sibi lumine eius regionis gentem illustraret, simul sperans ob gentis eius
fauitiam posse se illic martyrij palmam promere.

Cap. 4.

Interim autem Dagobertus rex, cùm non haberet filium, qui ipsi in regno succe-
deret, ea causa moriens non mediocriter, tertiam sibi assciuit vxorem. Atque tum de-
mum conuersus ad Deum, multorumque expertens preces, & largas præstans eleemo-
synas, eodem anno ex illa coniuge susfulit filium: quem cùm anxie cogitaret cuinam
vndis salutaribus expiandum diuinaque lege imbuendum trajectet, vt quædam modum
ipse beatum Arnulphum habuerat pædagogum, ita hic quoque ab insigni aliquo Dei
seruo ad Christianæ religionis præscriptum institueretur: memoria cœperit reſetere,
quanta iniuria virum sanctissimum Amandum affecisset, moxque ministris ablegatis,
eum vbiue iussit studiosissime inquire & ad se reduci. Ita ergo reuocatur ab exilio ve-
ræ pæco & cultor Euangeli, antistes venerandus, latrantur eius reditu rex & optimates
& populus omnis: ciusque pedibus se sternens rex, veniam petit, nec difficulter im-
petrat: orat pro filio, sed patitur repulsam, dicente viro ter beato, militantem Deo
non oportere negotijs implicari secularibus: moxque è conspectu regis celeriter se
proripiente. At rex nihil de suo remittit desiderio, Audoenum & Eligium viros prima-
rios, multaque prudentia & virtute conspicuos, beatoque Amando in primis charos
atque familiares, ad eum mittit, qui tandem inuitum eò suis precibus impulere, vt regis
voluntati se se accommodaret. Adducitur infans dies natus quadraginta, adhibetur
catechesis à sancto præfule, & cùm finita prece ex tanta hominum frequentia nemo
responderet, Amen, infans ille cunctis audientibus, clara voce respondit, Amen. Inde

Baptizat filium regis, & Sieberti nomine ei imponitur, atque ab Ariberto regis fratre è sacro fon-
te suscipitur. Sequenti anno Aribertus rex, nec diu post etiam filius eius abeunt è vita,
omnisque ditio Ariberti cessit Dagoberto. Quæ quidem omnia idecirè huic historiæ
volui inferere, vt lector facilius cognoscat, quæ Rictudri causa fuerit in Franciam ve-
niendi.

Cap. 5.

Cùm enim per id tempus Franci crebrè comearent in Vasconiam, Rictudis
puella bonæ indolis, ad nubiles iam perducta annos, conspicitur, amatur atque appe-
titur à Franco quodam Adalbaldo, præclaris & iustis orto natalibus: cuius mater Ge-
rebertha filia fuit sanctæ Gertrudis, in monasterio, quod Hamaticum dicunt, quiescen-
tis, quod ipsa construxerat: fueratque is Adalbaldus à puer optimis institutus discipli-
nis, multisque pollebat opibus & fundis, nec vulgarem gratiæ locum in regis aula obti-
nebat: dignus planè vir, qui Rictudem haberet coniugem: cui etiam iuxta morem
desponsa, & matrimonii lege sociata fuit, licet quidam virginis cogniti ab molestè fer-
rent. Neque ineundi coniugij huius causa fuit libido aut incontinentia, sed amor cha-
ræ sobolis. Nec deerant utriusque dotes animi & corporis, quæ in sponsâ speci-
tari solent. In Adalbaldo cernere erat generis nobilitatem, pulchritudinem, virtutem
& sapientiam, quæ ad conciliandum amorem plus habet virum. In Rictude formæ
elegantia, genus, opes, & mores, qui præ ceteris inquirendi sunt, visibantur. Itaque con-
uenienter illi sententia Apostolica, erat inter illos honorabile coniugium & torus im-
maculatus. Non enim surda acceperant aure, quod idem Apostolus dicit: An nescitis,
quoniam membra vestra templum sunt spiritus sancti, quem habetis à Deo, & non
estis vestri? Empti estis precio magno: glorificate & portate Deum in corpore vestro.
Fidem verò coniugij inter se accurate seruantes, compage fidei & charitatis erant duo
in carne vna, vnamimes, uno ore & concordi operatione honorificantes Deum, &
omnibus diebus vitæ suæ seruientes illi in iustitia & sanctitate.

Cap. 6.
Rictudis
proles.

Nati quoque eis sunt filii, & in ijs primogenitus Maurontus, postea Abbas & Leuita
factus, & tres filii, sanctæ virgines: Clotendis, post obitum matris eius monasterij mo-
deratrix: Eusebia, bona Dei cultrix, & Adalsendis. Quos parentes eorum, cùm essent
iusti, tum per scipios, tum per familiares ipsi Dei seruos in timore Domini erudiérunt
& educarunt, ab infantia cælesti benedictione auctos. Maurontus patrem spiritualem
habuit venerabilem Deoque dignum sacerdotem Richarium, qui per sacram baptismum
eum Christo regenerauit. Clotendem egregius pontifex Amandus & sacris manibus
è fonte salutari suscepit, atque in omnibus Deo dignam reddidit: Eusebiam Mathildis
reginam, Dagoberti coniunx ex sacro fonte suscepit. Poteſt non immerito de hac pro-
gne dici illud Sapientia: O quam pulchra est casta generatio cum claritate.

Accidit autem, vt Adalbaldus à pago Austrebateni, vbi multæ ei erant possessiones,
in Vasconiam triste suæ iter suscepit. Prosequebatur euntem aliquosque beata
Rictudis, sed iussa, citò domum se recipit moriens, quasi iam animo præfigret im-
minens malum. Ecce autem malignorum hominum, quos aiunt fuisse, quibus illud
coniugium

Cap. 4.
Cap. 7.

coniugium displicuerat, vir pius insidijs appetitur, vulneratur, perimitur. Sed planè non est ille mortuus, sed viuit feliciter in Deo, cohærens spiritu illi, qui est vera vita: quod quidem satis testantur signa, quæ ad eius sacra ossa non raro sunt. Citò autem trifissi max rei nuncius perfertur ad Christi famulam Rictrudem, quæ gemino eoq[ue] atroci dolore corripitur, quod & charissimo se sentiret orbatam coninge, & proles suas, tum etiam cognatos, videret eius nece grauissimè discruciar. Tandem autem luctu illo sopiro, cum seruis Dei ipsi familiaribus, præsertim autem cum Amando sanctissimo presule, de suo statu deliberat: auditque ex illo fidissimo consultore illud Apostoli: Mu-^{1. Cor. 7.} Claret mi-
lier alligata est legi, quanto tempore vir eius viuit. Quod si dormierit vir eius, libe-
rata est: cui vult, nubat: tantum in Domino. Beator autem erit, si sic permanferit se-
cundum meum consilium. Audit etiam illud Domini Saluatoris: Si vis perfectus esse,^{Matth. 19.}
vende omnia, quæ habes, & da pauperibus, & habebis thesauro in cælo: & veni, se-
quere me. Hæc & id genus alia verba salutis non surda aure accipiens S. Rictrudis, sed ijs
diligenter animum applicans, omni postposita ancipitis deliberationis mora, pollicet-
tur se eius salutaribus monitis obtemperaturam. Verùm antiquus serpens, inuidia & sti-
mulis percitus, tam salubre propositum modis omnibus impeditre conatur. Cōmouet
regis animum, ut persuadeat illi denuò nubere cuidam ex optimatibus suis. Illa autem
prosunt id respondeat, multa adhibet blandimenta rex, sed frustra. Blanditijs succedunt
terrores & minæ, sed tantundem efficiunt apud animum in Deo bene firmatum. Et minis po-
quia ex tribus Philosophiae partibus eam præcipue colebat, quæ in actione & reatu vi-
uendi ratione consistit, nec immerito viuendi magistra dicitur, quam Græci Ethicen,
Latinī Moralem vocant, ad quam primaria ille virtutes pertinent, prudentia, iustitia,
fortitudine, temperantia: his ipsiis accuratè sese communiens, quemadmodum per iusti-
tiam Deo magis quam hominibus obediens, atque per fortitudinem nullis cedere ad-
uersis constituerat: ita per prudentiam regis indignationem amoliri, & per temperan-
tiam intra modestiæ & humilitatis limites sese contineare decreuit. Itaque via consilio
sanctissimi Amandi, ad tempus dissimular immutabile animi sui propositum, spondet-
que regi se ex eius consilio facturam, quod sibi conducibilius videretur.

Hunc in modum cū regi persuasisset, sc̄ ipsius dictis paritaram, in prædio suo, in Cap. 8.
villa Baireio opiparum & regia maiestate dignum apparat conuiuum. Inuitat regem
cum optimatibus, & inter epulas sermonibus sale conditis omnes exhilarat. Postquam
autem repressa fame, edendi auditas remitti coepit, essentque iam coniuia fecundis
calicibus comites accepti, surgit matrona venerabilis à mensa, & non trepidè, sed con-
stanter: non tepidè, sed feruenter: non segniter, sed sagaciter: non muliebri, sed virili
planè animo, quod secum deliberarat, re ipsa exequitur.

Primum sc̄iscitatur ex rege, num illius bona venia licet ipsi in ædibus suis quod Cap. 9.
velit agere. Rege incunctanter annuente, quippe qui putaret illam sumpto poculo,
vt plerique solent, & se & coniuas alios ad potandum strenuè inuitaturam: è sinu suo
proferrit velum ab Amando pontifice consecratum, qui etiam hoc ei consilium dede-
rat, & inuocato terribilis Dei nomine & auxilio, suo illud capiti imponit. Tum verò rex vide præ-
ira permotus, ingratas relinquentes epulas, abscessit è conuiuo. At illa iactans cogita-
tum suum in Dominum, totam se illius arbitrio permisit & commisit: facultatibusque
& possessionibus prudenter distributis, spinosisque huius mundi curis è terra cordis sui
penitus extirpatis: quæ prius seruiendo Christo in membris eius, Martha gesserat offi-
cium, iam ad pedes eius sedens, audiebat verbum eius, optimam Mariæ partem, quæ ab Luc. 10.
ea non posset auferri, sibi deligens.

Vt verò quod in interiori gerebatur homine, id etiam exterior præ se ferret: sicut Cap. 10.
mentis mutarā habitum, ita mutauit & corporis: preciosisque abiectis vestibus, qui-
bus fuerat vsa in matrimonio, vt placeret viro, vnā cum eis omnibus se exuit huius mū-
di impedimenti, vt solicita semper cogitatione ea sola tractaret, qua Domini sunt, vt
illi vni deinceps placeret. Imposuit autem capiti teturum quandam amictum, vt interioris
hominis luctum & pœnitentiam designaret, possitque pro luctu breui & mœrore
momentaneo ea quandoque consolatione affici, de qua Dominus dicit in Euangelio:
Beati qui lugent, quoniam ipsi consolabūtur. Et vt quondam expertas corporis volupta-^{Matth. 5.}
tes & molestas dæmonum profligaret vexationes, in preces continuas & immodica-
propè ieunia incubuit, carneisque aspero cilicio domans, illud ex Psalmo canebat:
Ego autem, cū mihi molesti esent, in duebar cilicio: humiliabam in ieunio animam
meam, & oratio mea in sinu meo conuertetur. Porro locum, ubi spiritualibus daret ex-^{Psal. 34.}

er citijs operam, cum consilio & auxilio sèpè dicti antistitis Amandi, valdè sibi congruum delegit, nempe monasterium, quod Martianas vocant, ab eodem antistite ad flum Scarbum exædificatum, cui disponendo & constituendo vir sanctus Abbatem præficerat sanctum louatum venerabilem virum, cuius adhuc in eodem monasterio corpus conditum habetur. Et Amandus quidem monachos illi haberi voluit, sed locuatus sanctorum ibi congregauit. Hunc ergo locum, satis oportunè ab hominum strepitu remotum, Dei famula Ristrudis expetijt, & beato Amando non solùm consciente, sed etiam inter regem & ipsam pacem conciliante, cum maiestatis regia prærogativa obtinuit, vt illic se totam rebus diuinis manciparet.

Cap. II.

Matth. 5.

Vt autem omnibus palam innotesceret, à quanta perfectione suam inchoasset conversionem, conuenienter illi Euangelicæ sententiae, Luceat lux vestra coram hominibus, vt videant opera vestra bona, & glorificant patrem vestrum, qui in cælis est: post abiectiones à suis humeris onerosas prædiorum & facultatum sarcinas, post nuncupatum Deo continentia votum, post acceptum monastica religionis habitum, non contenta se solam Deo offerre oblationem viuam, sanctam, eique placentem: etiam tres filias suas, quas iam suprà memorauimus, illi obtulit virgines corde & corpore immaculatas, vt perpetuam seruantes virginitatem, agnum virginem, virginis matris filium, quo cunque ierit sequantur, cantentque ante Dei thronum canticum nouum, id est, cum agno aeternū exultent de carnis seruata integritate & incorruptione. Quod canticum licet audire possint sancti, nemo tamen dicere poterit, nisi illa candida turba incontaminatorum. Quod cum sit verissimum, audite, obsecro, & auribus percipite omnes, qui habetis audiendi aures, quibus adhuc fas est ad angelicæ castitatis aspirare prærogativa, & tam præclaris contubernij frui sodalitate, atque cum eis noui cantici suausissimam de promere melodiā. Properate, currite, & memores vxoris Lot, retro respicere nolite, Putridas putredine carnis concupiscentias edomate. Omnis caro foenum, & omnis gloria eius tanquam flos foeni. Penetrent hæc intima cordis vestri penetralia, nec meam hanc esse putetis adhortationem, sed beatissimi Patris Augustini, qui inter cetera ita dicit: Pergite sancti Dei, pueri ac pueræ, mares ac foeminae, celibes & innuptæ: pergit per seueranter in finem. Laudate Dominum dulcius, quem cogitatis uberiori: sperate felicius, cui seruiss instantius: amate ardenter, cui placet attentiū. Lumbis accinctis & lucernis ardentibus expectate Dominum, quando veniat à nuptijs. Vos afferetis ad nuptias agni canticum nouum, quod cantabitis in citharæ vestris, quale nemo poterit dicere, nisi vos. Et post pauca: Merito cum sequimini virginitate cordis & carnis, quo cunque ierit. Quid est eum sequi, nisi imitari? Quia Christus pro nobis passus est, relinquens nobis exemplum, vt sequamur vestigia eius.

Apoc. 14.

Virginum

privilegium

Gen. 19.

Esaïæ 4.

& 40.

De sancta

virginitate

cap. 27.

1. Pet. 2.

Cap. 12.

S. Ristrudis

dat se mo-

naстrio.

Adalfendis

obit.

Luc. 2.

Vide animi

fortitudinē

in matrona.

Itaque S. Ristrudis tres filias suas, vt diximus, in ætate adhuc tenera vni despondit viro Christo, vt canticum illud, quod iam per se non poterat, per illarum citharas Dominum depromeret: cunctisque sapienter dispositis, & curis omnibus huius mundi præcul abiectionis, monasterij gymnasium adjit, vbi vita huius breue tempus tanquam in agone decurreret, contra tartareos dæmones certando viriliter, nuda iam & expedita ab omnibus, ne possent eam vlla ex parte tenere illi maligni spiritus, vñctaque oleo celestis gratia, cuius ope freta, facile ex hostibus victoriam reportaret. Porro Maurontus filius eius in laico habitu regijs officijs & militaribus negocijs adhuc detinebatur, sed corpore potius, quam animi studio aut voluntate, de quo suo loco plura dicemus. Per id tempus mortua est Adalfendis, inter filias postremo loco nata. Obiit autem in ipsa sacrosancta Dominicæ nativitatæ solennitate, quando huic mundo in peccatis mortuo aduenit in Christo salus & remedium præsentissimum, quo profigatur mors cum authore & principe suo: vt Adalfendis non tam mortua sit, quam luci vitæ que perenni edita. At pia Ristrudis, inter aduersa fortis & longanimis, cùm se illi vno eodemque tempore ingens tum gaudij, tum misericordis materia offerret: hinc angelum toti mundo lætiſſimum nuncium adferentem audiret & dicentem, Euangelizo vobis gaudium magnum, quod erit omni populo: inde sive præ oculis haberet filiolæ triste funus, quod sine dolore cernere ipsa naturæ vis non sinebat: virili animi robore mulierem superauit affectum, nec passa est sibi dominari luctum, quem extorquet mors tam chari pignoris: nec voluit dare locum tristitia, vbi natalis celebratur vita. Itaque expletur sepultura officium more fidelium, premuntur lachrymæ, luctus faceſſere iubetur. Sic primus exactus est dies, sic secundus & tertius solennitatis dies. Vbi ad quartum ventum est, quo sancta Ecclesia parvulos pro Christo caſos

cæsos commemorat, prudentissima Rictrudis sciens quid cuīque deberet impendere tempori, & omni negocio tempus esse & opportunitatem, tempus gaudendi, itemque tempus flendi ita distinxit, ut post sacrorum explecionem mysteriorum, quibus ad Deilaudem cisdem sanctis martyribus non luctus exhibetur, sed honor, votaque praestantur non lachrymarum, sed ceremoniarum: cūm iam parata essent omnia, quæ ad corpora cibo potuque perficienda pertinerent, conuocatis sororibus ait: Eat iam charitas vestra, forores meæ, & dona Dei percipiatis cum gratiarum actione: me vero exemplo matrum, quarum hodiè ploratus & vultus auditus est multus, sinat innocentem filiolam meam, immatura morte præemptam, materna pietate lugere. His dicitis, amicum mœrori locum secretum petiit, dolorique, ut natura poscere videbatur, indulxit. O verè laudabilem & admirandam foeminam, quæ fortitudine accinxit lumbos suos.

Iam veniamus ad Maurontum, cuius suprà meminimus, S. Rictrudis filium primo genitum, ab egregio Christi sacerdote Richario per sacram baptismum regeneratum: Accidit aliquando, vt idem venerabilis presbyter Richarius tum pro sanctitate, tum pro familiaritate equo vectus beatam Rictrudem inuiseret: cūmque post sancta colloquia vir Dei consenso equo vellet abscedere, illa, filiolum Maurontum in vlnis gestans, paululum è domo progressa, eum prosequebatur, ut benedictione illius filiolus suus muniretur. Postquam autem vir Dei equo sedens infantem in manus accepit, siue ut illi bene precaretur, siue ut oscularetur eum, equus, agente malo dæmoni, cœpit ferocire, dentibus frendere, pedibus calcitrare, magno impetu sursum deorsum cursitat. Itaque sacerdos & sibi & pueru meruebat: mater pro vitroque anxia, & iam penè exanimis, quod putaret certum vtrique exitium impendere, auerso vultu, tam triste spectaculum videre non sustinuit. Flebat etiam familia non medicriter. At vir Dei tenens fortiter parvulum, ne laberetur, preces fudit ad Dominum: quibus completis, & puer instar auiculae ille sus in terram perlatus est, & equo pristina rediit mansuetudo. Insigne misericordia eius. Tum vero mater, recepto spiritu, filium ipsi arridentem in suas sustulit vlnas, & ingens racculum. mœror omnium versus est in gaudium haud vulgare: nec debet ambigi vitrorumque meritis id ita euenisce. Et quia tam infinitè benigna est Dei clementia & bonitas, vt quod malignus dæmon sanctis in perniciem machinatur, ille ad eorum profectum conuertat: tentatio hæc beato viro cessit ad virtutis augmentum. Cogitans enim apud se, humani generis Saluatorem, cūm ad nos redimendos iret Hierosolymam, non phalerato sedisse equo, sed humili potius asello, deinceps cūm aliquò esset proficiscendum, non equo vsus est, sed asello mansuetissimo.

Postquam autem Maurontus ad viriles peruenit annos, cūm esset vir nobilis, regis lateri adhæbat, qui perpetuis eius officijs & ministerijs vtebatur. Data autem est opera, vt sponsa ei afficeretur: sed Amando pontifice spiritualis amoris suauitates & æternæ vita inæstimabiles iucunditates ei prædicante, voluptuosos carnalis amoris comedes, quibus iam ferè pedem iniecerat, dirupit. Cum autem matri indicasset se nolle spōnam admittere, illa metuens, ne per abrupta lasciuæ præcipitia, vt plerique solent adolescentes, iret in profunda gehennæ, non mediocriter dolere coepit, oratque S. Amandum, vt ipsam ea in re iuuare velit. At vir sanctus eius precibus annuens, Marianas venit, optimisque sermonibus eam demulcens, pristinæ in Deum alacritati restituit. Accessit inde ad Missarum peragendam celebritatem, & cūm illic Maurontus adstaret, vidit sanctus episcopus apem, ter eius verticem circuulantem: nec ignorans quid ea res portenderet, eum aduocat, hortatur vt quamprimum opere perficiat, quod iam pridem animo velle coepisset. Nec defuit Maurontus sancti virimonitis: cūmque idem beatus antistes more Ecclesiastico totondit, decisæ coma capitis eius, vt coronæ signum vel effigiem ferret in capite: per id, quod exteriùs siebat, innuens, quid eius significatio- ne intus seruari oporteret: nempe vt vertice capitis nudato designaretur, præpotenti Deo nuda & aperta esse etiam arcana pectorum, nihilque vel abditissimis versari cogitationibus, quod fugiat oculos cuncta cernentis: Porro crebra capillorum refectione, indicaret assidue resescandas malarum cogitationum superfluitates. Denique corona & summi sacerdotis tiaram, & regiæ dignitatis diadema exprimeret, vt inde admoneretur ad regale se pertinere sacerdotium, & post victoriā, ex multuarijs mortalis vitæ tentationibus reportatam, meritò se recepturum vitæ immortalis coronam, quam Deus promisit diligentibus se. Quæ quidem sanctus vir Maurontus, non solum ex beatissimi præsulis huius traditione, sed etiam ex diuinarum scripturarum lectione suscipiens &

Aa 3 memoriae

Ecces 8.
Isaiah 22.
Jerem. 11.
Matthew 2.
S. Richarij Tom. 2. 26.

April.

Matthew 21.
Mauronti brevis historia.

Corona rati capitis quid significet.

memoriae commendans, studuit semper diligentissimè re ipsa compleere. Factus enim postea diaconus, illi muneri congrua viuendi ratione & optima conuersatione respondit. In aula etiam regis, quippe clara editus pro sapia, præclarè functus est officio regiorum conscribendorum diplomatum, sive edictorum. Et ut ad sanctæ conuersationis eius cumulum non parum accederet, sancti Amati Episcopi ei conuictus obigit: qui beatus vir cum Senonensis esset episcopus, falsò apud Theodoricum regem, qui per id tempus tyrannidem exercebat, insimulatus fuit, tanquam in regem perfidæ crimen admisisset: atque ea causa in Perona monasterio, in Veromanduorum oppido sito, cui tum sanctus Abbas Ultanus praerat, iussus est exil degere. Mortuo autem Ultano, traditus est Mauronto abbatii, vt is cum in custodia assenseret in Broyo monasterio, quod ipse nuper admodum construxerat in Lætia territorio. At Maurontus illo ad se recepto, vt eius religiosam comperit conuersationem, haud aliter arque calefia asseruando thesauro cunctis vitæ eius diebus omnem ei curam & ministerium impedit, gaudens habere se in illo & sibi & fratribus suis vita & sanctitatis propositum exemplar.

Cap. 15.

Interea Dei famula Gertrudis, uia Adalbaldi, iam prouecta admodum ætate, & multis leuigata operibus bonis, in Hamatico monasterio, quod ipsa ædificauerat, vbi etiam sacra virgo Eusebia, eius proneptis, educabatur, viam vniuersæ carnis ingredia est: cui in monasterij regimine eadem Eusebia successit, bona quidem indolis puerilla, sed adhuc teneræ ætatis, ut potè duodenis. Itaque mater eius Rictrudis, altiori via consilio atque prudentia, non ignorans multos etiam in virtutibus exercitatos hostis tartarei astutia decipi, tum etiam metuens ætati illi filia sua, ne præproperam adeptam libertatem, illius malispi serpentes fraudibus circumscriberetur: ad se eam acciuit, se cumque habitare voluit. Recusante vero illa, & in Hamatico cœnobio permanere volente, mater eius regias compulsa aures appellare, facultatem obtinuit illam regis autoritate reuocandi. Atque ita coacta Eusebia, ad matrem venit mōcrens, secumque ad duxit rotam congregationem suam & proaviae sanctæ Gerrudis corpus cum reliquijs sanctorum, quæ illi conditæ fuerant. Mater autem eius, voti compos effecta, hortabatur illam multis verbis, ut cum ipsa in spirituali militia Deo inferuiret. Et illa quidem maternis admonitionibus libertissimè parebat, diuinis ministerijs ingiter se mancipans: sed tamen non potuit amio eius & desiderium reuocari ab Hamatico monasterio, quæ ei quasi innata videbantur. Quamobrem flebat saepissimè, & prop̄ singulis noctibus post absolvitam vespertinam synaxim, cum eam putarent se dare cum alijs quieti, illa, relictis ante lectum sandalijs, ibat ad Hamaticum monasterium intempestivæ noctis silentio, cum eo, quem ante diximus, sanctissimo episcopo & monacho Amato, & cum collactanea sua, alijsque fidis, ut putabat, sui secreti socijs. Ibi que celebriatæ vigilis & omnium horarum officijs, Marianas reuertebatur, fideli illo peracto finito, ne illi nocturnis precibus non interfuisse deprehenderetur. Nec desuit tamen, qui hac ad matris notitiam perferret: quæ eam ad se vocans & blandis mulcebat, & asperis terrebat sermonibus, ut eam ab hoc proposito retraheret, sciens eam magis carnis propinquitate quam spiritus permoueri. Sed cum neque per se, neque per amicos quicquam proficeret, initio cum filio Mauronto, Leuita & Abbatie venerabili, confilio, ut risque placuit, ut pro huiusmodi inobedientia & pertinacia, verberibus Eusebia castigaretur. Itaque Maurontus, tenente eam famulo, verberauit eam: sed interim ad capulum ensis, quo famulus accinctus erat, gratiiter attriuit latus teneri corporisculi, ita ut multis, quibus postea superuixit annis, purulentam & sanguine mixtam ab ore salivam eiecerit. Verum neque hoc pacto eius compresso desiderio & conatu, conuocantem propinquis locis episcopos, abbates & illustres viros: qui omnes varijs modis eam nitebantur ab hoc studio reuocare, sed frustra. Tandem igitur consilium hoc illius matri dedere, ut sineret eam optatum repetere locum: quibus etiam assensit mater, quanvis inuita. Confirmabat autem eius religiosam conuersationem maternis adhortationibus, & Deo eam precibus commendans, se dimisit. Ea igitur voto portita suo, cum omnibus suis lata abiit ad Hamaticum cœnobium, secum cō reducens corpus proaviae suæ cum venerandis sanctorum reliquijs: ibi sanè angelicam dicens vitam, in medijs adolescentiæ annis rapta est ad celestis sponsi thalamum, ne malitia mutaret intellectum illius, aut fictio deciperet animam illius: & consummata in breui, expedita tempora multa.

Cap. 16.

Non desunt autem, qui dente rodant canino, quod diximus sanctam virginem tam male

S. Amatus
Senonensis
episcopus.
Sigebertus
in Chron.
anno Chri-
sti 672.

Eusebia.
amor erga
Hamaticæ
cœnobium.

innotescit
in secessu
in finit.

mālē acceptam à matre Rictrude & fratre Mauronto : sed nouerint illi, Rictrudem nō villo odio insectatam filiolā suam, sed eius immaturā timuisse extati. Sciebat enim scriptum à sapientissimo Salomone: Puer, qui dimittitur voluntati suæ, confundit matrem suam. nec illud Ecclesiastici ignorabat: Filia sunt tibi serua corpus earum. Vō. Eccli. 7. luit igitur filiam apud se manere, ut suis & adhortationibus & exemplis ad perfectiora eam proddheret: & Duxbia, licet se sciret cælesti regi despontatam, non tamen sanctam matrem protervè aspernabatur, sciens sponsi sui illud esse præceptum: Honora patrem & matrem, ut sis longævus super terram: sed innitens gratiæ eius, qui ipsam sibi desponderat, eiusque viuis flagrans amore, nec maternum quidem affectum sibi patiebatur ullum furooris sui adferre detrimentum. Et Maurontus quoque frater eius, non odij crudelitate id fecit, quod eam flagellauit: sed matri immorigeram & propè insolentem volebat coercere. Etsi autem eterque & mater & frater in illa castiganda humano quodam errore lapsi sunt, ignorantes gratiam Dei, qua illi inerat: non debent tamen temerè reprehendi, cum non possint ea numerari in operibus iniquitatis, qua ex charitatis radice proficiscuntur, dicente ipsa veritate Christo: Si occlus tuus fuerit simplex, totum corpus tuum lucidum erit. Quod verò hac occasione in morbi incident sacra virgo, quo etiam non caruit quandiu superuixit: quis non videat hoc illi ad collatæ gratiæ cumulum accessisse, ut dum corpore deficeret, spiritu roboraretur, conuenienter illi Apostolica sententia: Cùm enim infirmor, tunc potens 2. Cor. 12. sum. Et certè eius conuersatio talis fuit, ut verbis exprimi vix queat. Præbebat talia de seipsa exempla, qua alia omnes merito sibi imitanda proponerent. Erant virginis prudentissimæ tales mores, talisque habitus, ut virtutes omnes ex ipsa relucerent: prudentia in verbis, iustitia in decernendis iudicijs, temperantia in licitis & vetitis, fortitudo in rebus duris & aduersis. Cùm necessitas interdum cogeret negotijs intercessio secularibus, nihil ex his cius animo inhærebat. Et vt paucis expediā, virtutes omnes obtinere studuit, & tamen easipſas sapienter occultauit. Ita annos nata plus minus vigintrites, cùm diuinitus cognouisset diem obitū sui, omnes in sancta professione sub se militantes acciuit, hortabatur eas in mutua perseuerare charitate, in proposito inviolabilitate permanere, obediētiā promptissimè exhibere, nec de diuina quicquam diffidere prouidētia, licet ipsa eis subtraheretur. Hæc atque alia cùm dixisset, omnesq; Domino commendāset, repente domus, in qua decumbebat, immenso est lumine Eusebiæ fe. perfusa. Quo recedente, sancta illa anima pariter migrauit à corpore, & ad vitam est līx obitus. profecta sempiternam, 17. Calendas Aprilis.

Postquam autem sanctum episcopum & monachum Amatum Dominus ab hoc exilio ad cælestem patriam Idibus Septembri euocauit, sacrum eius corpus Maurontus in sua possessione tumulauit, omniaque prædia sua per chartarum instrumenta tradidit: & licet matri sua fuerit superstes, tamen etiam ipse post expleta piæ admī- ^{hīc deest} nistrationis munia, felicem Christo spiritum reddidit tertio Nonas Maij. Sed iam in exempla ad S. Rictrudem nostra se recipiat oratio: quæ sanè omni mentis studio & toto corripiorū conatu bonis operibus dedita, & de virtute in virtutem proficiens, dilatafo cor aur aliiquid de infatigabilitate cucurrit viam mandatorum Dei in stadio fidei & iustitiae, patulis eiusmodi hauriens auribus illud Apostoli: Sic currite, ut compræhendatis, nempe brauium i. Cor. 9. cælesti. Et vt perfectissimam se exhiberet illius imitatione, qui dixit: Non veni face- Iohan. 6. re voluntatem meam: alterius regimini se sponte subdidit, iussa eius promptissima obedientia capessens, & famularum scilicet famulam exhibens: semper ob oculos ver- sans illa Salvatoris verba: Filius hominis non venit ministrari, sed ministrare: nec vñquā extra monasterij septa progressa est, cunctisque bonorum operum se ex- exemplum præbuit in humilitate, in patientia, in castitate, in ieiunis, in vigilis, in orationibus perpetuis, in longanimitate, in mansuetudine, in mode- Epheſ. 5. fia & benignitate. Et ne sim longior, vt filia lucis semper ambulauit in luce, cuius fructus est in omni bonitate & iustitia & veritate: sicque in sanctarum virtutum stu- dio perseuerans, cùm ad annos peruenisset quatuor & septuaginta, 4. Idus Maij, cor- pusculum terre, spiritum verò reddidit cælo: sepultaque est honorificè à Dei sacer- dotibus alijsque Ecclesiastica dignitate ornatis viris, & permultis ad eius funus con- currentibus.

Ne quis autem de eius meritis & sanctitate possit ambigere, multa diuinitus co- Cap. 18. ruscant virtutum & miraculorum signa ad eius sacras reliquias, sicut testantur, qui Au'hor in- suis oculis cōspexere. Te igitur sancta ac Deo dilecta Rictrudis toto cordis affectu ob- uocat S. Ri- drudem.

secramus, vt tuis sanctis precibus & meritis, quibus variarum soluis ægritudinum nexus, nos à peccatorum nostrorum vinculis absoluas, vt benignissimi Saluatoris gratia his expediti, in tremendo iudicij die, cælis & terris ardentibus, ipse nos à gehennæ flammis creptos, tecum ad æternæ felicitatis gaudia deducat, cuius misericordia nullus est finis: Cui cum Patre & Spiritu sancto est regnum, virtus, honor & gloria per infinita seculorum, Amen.

MARTYRIVM SANCTI ALTERIVS ALEXANDRI, AVTHORE SIMEONE METAPHRASTE.

13. Maij.
Cap.1.



VO tempore impius Maximianus imperabat, persecutio multa contra Christianæ religionis sectatores per omnes regiones commota erat. Centurio autem quidam, dæmonum amicissimus, Maximiani Imperatoris insu erexit templum Ioui longè ab urbe Roma stadio uno. Edixit igitur Maximianus Imperator, vt quicunque Christianam fidem sequebantur, dijs ipsis sacrificare cogerentur: iussitque omnes præstò esse in templi dedicatione, ac præcones ipsos per totam urbem indicere, vt quicunque illic essent deorum studiosi, crastino die omnes in templi dedicatione cum Imperatore conuenirent. Itaq; omnes, audita præconum voce & tubæ ipsius clangore, parati erant vnâ cum Imperatore in Iouis templo præstò esse. Multi ergo, rebus omnibus omissis, templum adiérunt, & Ioui sacrificârunt. Quidam verò admodum dines, Tyberianus nomine, sub imperio suo habens milites, à Felice tribuno sibi commissos, omnes illos conuocauit, eisque hæc dixit: Audite, fratres. Scitis vos omnes, quemadmodum Imperator præcepit, vt hodierno die in templo Iouis cuncti vnâ cum ipso præstò sim us. Parate igitur vos, vt mecum vnâ in templum veniatis. Hæc cùm militibus suis diceret, nunciatum illis fuit, Imperatore in templum venisse. Tunc celeriter cum Tribuno ipso milites omnes properabant, vt Imperatori assisterent.

Cap.2.
Alexander miles Christianus.

Vnus verò ex illorum numero, nomine Alexander, cùm à puero pietatem seruâs, Deum ipsum timeret, Tribuno respondit: Si ad Deum illum, qui verè Deus cælestis est, nobis cundum esse dixisses, eumque adorandum, rectè quidem locutus fuisses. Quos enim vos deos esse dicitis, dæmones illi sunt, non dij. Tum Tyberianus: Non omnibus, inquit, dijs, sed vni deo Ioui nobis nunc sacrificandum esse dixi, licet sint alij, quos & Imperator, & nos colimus. Ad hæc Alexander: Iouem ipsum deum nominasti: at ille talis est, qualis & cateri, qui dæmones sunt valde fallaces, cùm eos à quibus coluntur, circuinuenire atque omnino perdere soliti sint: quemadmodum & Iupiter impetus ipsi afferitis, illum ipsum Iouem aliquando mulierem appetiuisse, & cùm illâ iuxta mare inuenisset, ipsam deceptam corrupisse. Quis vestrum vnquam vidit, aut aliquando audiuit, Deum impuris facinoribus labefactari? Non solum igitur, vt dixi, dæmones, sed etiam fallaces illi sunt. At noster Deus corporeis oculis non cernitur, qui cœli & terræ effector est: neque ijs indiget sacrificijs, qua vos impuris dæmonibus offerre confueuistis: sed sacrificium postulat purum ac sine sanguine. Hæc cùm Tyberianus audiuerit: Omitte, inquit, insaniam istam, Alexander, & deos ipsis beneficiorum authores ne contemnas, nè fortè Imperator hæc audiat, & aduersus me indignetur, quod te talia dicentem feram.

Cap.3.
Iupiter impetus.

Hæc cùm dixisset, festinabat vnâ cum Imperatore in templo esse: erat enim tēpus, quo Imperator dijs sacrificia offerret. Memor verò eorum verborum, quæ à milite suo audiuerat, Maximianum adiit, & ita eum allocutus est: Milites omnes, Imperator, quos mihi maiestas tua commisit, tuo edicto inferuentes vidi: vnuis verò è militibus non solum mihi repugnauit, sed deos etiam ipsos contumeliosis verbis affectit, affirmans deos illos, quos tu Imperator, & nos colimus, dæmones esse impurissimos: neq; cogitat eos, qui edictis imperij tui aduersantur, mea manu interfici. Hæc cùm Maximianus accepisset, militi, de quo hæc audiuerat, valde iratus fuit: & Vbinam, inquit, ille est, de quo hæc dicas? Agè duc illum ad me, vt sciam quid ille sentiat. Tum Maximiano Tyberianus: Ira edictum tuum, Imperator, & meipsum miles ille pro nihilo fecit, vt huc venire neglexerit. Ilicò Maximianus iussit tres milites abire, & illum ferreis